


ALAHADY FAHA 14 MANDAVANTAONA - A



I JESOA: BE FITIAVANA SY MALEMY FANAHY

Ry Kristianina havana, manomboka volana vaovao isika. Tsy mbola mahita ny mazava anie isika miatrika ity aratin-mandoza ity. Mbola ao antin'ny ady mafy isika. Noho izany aoka tsy ho raviravintanana isika amin'ny fanarahana ireo fepetra fiarovantena rehetra. Tohizantsika ary hamafisintsika ny vavaka. Hiezaka mafy koa isika hametraka ny rafitra manampy antsika hahay hifarimbona hanampy ireo izay tena mila fanampiana. Io ilay lazaintsika solidarité ka ny ivon'izany solidarité izany ny voamiara sosialy miainga any amin'ny Eglizy fototra. Maharezà àry isika ary mitsodrano anareo aho.

Vakiteny I : Zak. 9. 9-10

Tononkira : Salamo 144

Vakiteny II : Rôm. 8, 9. 11-13

Evanjely : Mt. 11, 25-30

Araka ny voalazantsika tamin'ny alahady lasa teo dia isaky ny Alahady mandritra ny vaninandro mandavantaona dia manolotra toetra anankiray antsika ny Eglizy amin'ny alalan'ireo vakiteny izay henointsika ny Alahady ka

halalinintsika mandritra ny herinandro mba hahatonga antsika ho Kristy mpiara-belona amin'olona, ho EOVI MISIONERA TABERNAKLA VELONA MANORINA ETA KA ZARY TARANAKA MPANORINA LANITRA VAO SY TANY VAO.

Ny fanaovana soa, ny fandraisana ny vahiny, ny fandraisana ny hafa no nohalalinintsika tamin'ny Alahady faha-13 lasa teo mba hahatonga antsika ho Kristy eo anivon'ny mpiara-belona amintsika, hahatonga antsika ho fanasina amin'ireo mpiara-belona amintsika fa indrindra amin'izao vanimpotoana sarotra izao. Noho isika tabernakla velona dia adidintsika no mizara ny fahasoavana amin'ny alalan'ny fifarimbonana sy firaisankina antsoitsika hoe "solidarité".

Amin'izao Alahady faha-14 mandavantaona izao kosa dia toetra anankiray ao amin'i Jesoa indray no ianarantsika ary alohan'ny hianarantsika azy dia i Jesoa mihintsy no miantso antsika mba hiombona Aminy ka lazainy hoe : "*Mankanesa aty amiko ianareo izay manana enta-mavesatra fa hanamaivana anareo aho ary tsy misy mahalala ny Ray hafa tsy ny zanaka ihany, hanamaivana*

anareo aho, ento ny jiogako ary mianara amiko fa malemy fanahy sy manetry tena ao am-po aho dia hahita fiadanana ianareo".

Teny nanentana antsika tamin'ny fankalazana ny Fo Masin'i Jesoa fa indrindra maro ny asa lohantsika, ny adin-tsaina aterik'ity aratin-mandoza ity. Maro ny kivy very fanahy mbola velona. Miantso antsika i Jesoa ary manirika ihany koa satria isika no Kristy Mpiarabelona amin'ny olona amin'izao vanimpotoana izao.

Noho izany no tsy maintsy hanana antsika ireo toetra ireo ireo no tsy maintsy toetrantsika ry Kristianina havana ary izany koa no averimberintsika isaky ny manao fanokanan-tena amin'ny Fo masin'i Jesoa isika : "Ry Jesoa malemy fanahy sy manetry tena ao am-po, ataovy manahaka ny fonao fonay". Tsy maintsy mianatra ny Fon'i Jesoa isika mba ho Kristy mpiara-belona amin'olona.

Raha fintinina ity Alahady faha-14 mandavantaona ity dia isika izao no tsy maintsy zary Fon'i Jesoa eo amin'ny mpiara-belona, ny Fon'i Jesoa izay naratra nibaby ny fahotantsika na dia tsy nanota aza. Izany toetran'i Jesoa malemy fanahy sy manetry tena ao am-po izany no hahafantaran'ny olona an'i Kristy ka izay koa no tsy maintsy ho toetrantsika eo amin'ny manodidina antsika mba hahatonga ny olona hahalala an'i Kristy. Manasa sy manentana ny olona araky ny tenin'i Kristy izany isika : "mankanesa aty amiko...", isika no hanampy ny olona hanatona an'i Jesoa.

Hoy Md François de Sales : "Tsy amin'ny alalan'ny vinaigre no hahazoantsika an'ireo lalitra manodidina antsika izany hoe ny mety hanapotika an'izao rehetra izao ; fantantsika fa ny lalitra dia amin'ny alalan'ny tantely no entintsika hitaritana azy ireo, torak'izany koa amin'ny alalan'ny fitiavana marina no ahafahantsika mitarika ny hafa hanatona an'i Jesoa ka hahatsapany araky ny Vakiteny voalohany ao amin'ny bokin'i Zakaria Mpaminany : "Faly ny olona satria tonga ilay hafatra hitondra fahasoavana ho azy ireo".

Tsy ho takatry ny saintsika izany fahasoavana izany, tsy amin'ny alalan'ny fahaizantsika ara-tsaina no entintsika handresy lahatra an'ireo olona manodidina antsika na koa amin'ny alalan'ny fomba maro ety ivelany fa amin'ny alalan'ny fiainantsika anatin'ny fahatsorantsika, anatin'ny fanetren-tenantsika. Izany no nahatonga an'i Jesoa ao amin'ny Evanjely mitodika amin'ny Ray : " *Misaotra Anao aho, Raiko, Tompon'ny lanitra sy ny tany, fa nanafina ny hevitrao tamin'ny hendry sy ny be saina lanao, ary nanambara azy tamin'ny tso-po kosa. Eny, misaotra Anao aho, Raiko, fa izany no sitra-ponao.*" Tsy Andriamanitra no manafina ny tsiambaratelonny amin'ireo manam-pahaizana fa noho izy ireo matetika tsy manana ny fahatsoram-po sy fanetren-tena ka rakotra ny masina, donton'ny sofina. Matetika koa voa fitaka isika ka lavo amin'ny fakampanahy sy fandrangan'ny modèle piraté hoy isika. Mila miova ny fontsika. Hiova ny fontsika raha mihaona marina amin'i Jesoa isika. Raha mihaona amin'ny Fon'i Jesoa. Io ilay lazain'i Papa : "Izay nihaona marina amin'i Jesoa dia tsy maintsy miova ary mampiova ny hafa, ny manodidina azy".

Mitodika aminareo tanora aho amin'izao andro sarotra izao. Maro isika ny repère atlotr'izao tontolo izao. Repère tsy izy anefa ka mitondra any ankady. Mahavery. Aoka isika handray an'i Jesoa ilay any azo itokisana tsy mivadika mandrakizay milaza amintsika : "izaho no lalàna sy fahamarinana ary fiainana". Matokisa azy isika. Mety misy fanaratsiana sy fanenjehena na dia ny hetraketraka ataon'ny olona aza dia isika izao no Kristy mpiara-belona amin'olona. Isika no EOVI MISIONERAN'NY TANORA

Fantatsika ny vokatr'ity aratin-mandroza ity ankoatry ny mahaaretina azy dia manjaka hetraketraka eo anivon'ny fiaraha-monintsika, eo anivon'ny fianakaviansika, eo amin'ny toeram-piasana ary hatramin'ny tontolo iainana aza. Fantatsika ihany koa fa anio ny ho avy fa tsy rahampitso. Lova inona àry no apetratsika amin'ny taranaka? Noho izany indrindra tsy misy lova intsony ny hoavintsika raha izao no mitohy satria famonoan-tena no ataontsika amin'ny tsy fanajana ny tontolo iainana, maty ny taranaka araka ny voalaza hoe izay mandoro ala dia tsy hoe mandrora mitsilany fotsiny fa mamono taranaka, fa izay mamboly kakazo , hazo kosa dia mamboly fanantenana, mizara aina amin'ny hafa ka mankato ny tenin'i Kristy hoe *mankanesa aty amiko ianareo izay mitondra enta-mavesatra sy vesaram-pijaliana fa hanamaivana anareo aho*. Mitaky falemim-panahy tahaka ny Fon'Il Jesoa. Maivana tokoa ny fiainantsika raha manahaka an'i Kristy malemy fanahy isika amin'ny fiainantsika andavanandro, amin'izay tsy misy intsony ireny korontana sy herisetra sy hetraketraka eo anivon'ny fiaraha-monina sy tontolo iainantsika ireny fa ao anatin'ny fiadanana no iainantsika ary fiadanana tsy araky ny fanomezan'izao tontolo izao satria ny fandriampahaleman'izao tontolo izao dia matetika filaminana vokatry ny herisetra. Hahita fiadanana tokoa isika raha voahajantsika ny tontolo manodidina antsika ka amin'izay Kristy mpiara-belona amin'olona tokoa isika tahaka ny ampianarin'i Md Paoly amintsika hoe : " *Ary raha ny Fanahin'izay nanangana an'i Jesoa ho velona no mitoetra ao anatinareo, dia izay nanangana an'i Kristy Jesoa koa no hamelona ny vatanareo mety maty, noho ny Fanahiny izay mitoetra ao aminareo*" Feno ny fanahin'Andriamanitra isika ka izany Fanahy nananganana an'i Jesoa ho velona izany no mitoetra amintsika. Tsy fanahin'izao tontolo izao, tsy fanahy ara-nofo satria raha ny nofo no manjaka dia ny lainga ny ady ny fitapitaka ny vetaveta ny korontana sns no hita. Tsy ireny no manjaka raha i Kristy no avelantsika manjaka amintsika. Raha ny Fanahin'i Kristy no avelantsika manjaka amintsika dia zary malemy fanahy sy manetry tena ao am-po tokoa isika. Araka ny voalazan'i Md Paoly dia hitoetra ao anatintsika i Kristy ka zary fiadanana ny fianantsika. Io no irintsika mianakavy fa tsy ny fahendren'izao tontolo izao.

"Misaotra anao aho Raiko nanafina an'izany rehetra izany ho an'ny manan-kendry fa nanambara izany ho an'ny tso-po".

Ry Jesoa Tompo ô, enga anie hanahaka anao tokoa izahay ary indrindra enga anie ho tonga eto anivonay ianao niany milaza hoe "mankanesa aty amiko". Enga anie izay ho tena EOVI MISIONERA TOKOA ka indro manatona anao, ampianaro izahay hanana izany fahalemem-panahy izany, hanana Fo feno fitiavana sy fanetren-tena ka ho lavitra amin'ny fonay ny fahendren'izao tontolo izao mifanilikilika fa ny Fanahinao kosa no anjaka ao aminay ka zary TABERNAKLA VELONA izahay hanasoa ny hafa fa indrindra ireo sahirana ao anatain'ny fifraimbonana "solidarité".

Misaotra anao tokoa izahay ry Jesoa Kristy zokinay, nampahafantarinao anay izany lalan-kombana izany ary tsy Iza ny làlana fa lanao ka tohano amin'ny fahasoavanao izahay.

Fantatrao fa osa sy malemy izahay ka mora voasariky ny rendrarendran'izao tontolo izao, ampianaro izahay mba ho be fitiavana tokoa, hanana fahalemem-panahy sy fanetren-tena, hahay hampanjaka ny marina ka hahita fa mora entina ny jiojanao dia ny didim-pitiavanao, ka ho maivana aminay tokoa ny manara-dia Anao. Amen

Mompera Arseveka Mgr Benjamin Ramaroson